


尚湖推書





漢書門	
九	類
七	函
八	架
七	冊
二	冊
四	冊

內閣文庫	
漢書	類
九	冊
七	冊
八	冊
二	冊
一	冊
函	冊


內閣文庫	
番號	漢 9787
冊數	24 (16)
函號	308 102

下





河圖洛書淺草文庫



河出圖洛出書自古相傳人或疑之誤為聖人神道  
 設教耳未必真有其事也然而後世往往有見之而  
 可証者要當信其事之實有焉 山堂肆考云興國  
 之儒林鄉有石圓如龜背項皆具人謂之龜背石彷彿  
 八卦形象逐月隨斗杓旋轉土人疑其恠移置他所翌  
 日復歸故處人因視之 唐書先天三年江都  
 獻靈龜六脾腹下有玄文象卦爻 彙苑明皇在位  
 靈郡得異馬于河其狀龍鱗虺尾拳毛肉鬣居帝闕

二十一年帝西奔入渭水化爲龍游泳而去 車頻秦書云符堅建元十二年高陵縣民穿井得大龜三尺六寸背負八卦古字堅似石作池養之乃知河圖洛書誠有之矣 廣輿記陝西秦州有畫卦臺相傳伏羲畫八卦于此雪後猶見卦痕 酉陽雜俎云孝億國界三千餘里舉俗事祇不識佛法又銅馬俱在德建國烏澣河中澣流中有火祇祠祠內無像于大屋下置小廬舍向西人向東禮神有一銅馬國人言自天而下屈前足在室中後足入土自古數有視竟不

及其蹄西域以五月爲歲首每歲自烏澣河中有馬出其色如金與此銅馬嘶鳴相應俄復入水然則馬固有自水中出不獨漢之渥洼水也 湧幢小品云蔣粹翁政和人宋季爲太學生元混一天下遂歸隱于滿月山常言先世家九峯山下畜一牝馬舍側有龍潭馬入浴其中龍與媾而生駒焉龍首馬身狀如負河圖者有父老曰昔仲尼筆削六經而麒麟出今朱晦翁表章四書而龍馬生聖人之瑞也晦翁聞之遂不自居謹視芻牧後牧于山林竟失所在 閩書

歸化縣瀚溪其澗中有大石紋如龜又有八小石如龜四圍繞之如八卦名八卦石 宋明帝泰始二年八月六眼龜見東陽長山文如卦爻太守劉勰以獻 晉書魏之初張掖金山柳谷有石生焉周圍尋丈中高一仞蒼質素章有五馬麟鹿鳳凰仙人之象當時稱為祥瑞處士張洵曰夫神兆未然不追往事此蓋將來之休徵當今之怪異也既而晉以司馬氏受禪

兵之先兆

天生五材誰能去兵運數所臻天亦不能違之至其兆往往有先見蓋示人以修德銷弭之方及爲思慮預防之策庶幾不至于潰決而不可收拾耳 庚巳篇云陸容居吳之婁門外正德丙寅春一日薄暮容倚門獨立聞隔岸洶洶若有兵甲聲已而有數百千人自腰已上不可見腰以下所可見者皆花繒繳股其行甚疾容大驚呼其家男女老幼畢出皆見之踰時過始盡是歲崇明海寇鈕東山作亂奏調京軍及

諸衛討之歲餘乃罷官帑爲之一空容所見蓋兵象也 元周密浩然齋視聽抄云癸酉十月李應山開淮關于維揚一日午後忽見天裂其車馬旗幟無數始焉皆紅旗繼而皆黑凡茶頃乃合見者甚多次年北軍至 史異云隋獻皇后山陵西北鷄未鳴前方圓五六百步從地屬東南又有旌旗車馬幕布滿七八里許并有人往來檢束部伍甚整日出乃滅同見者千餘人 金史海陵天德六年八月臨潢府聞空中有車馬聲仰見風雲杳諸神鬼兵甲蔽天自北而南仍有語促行者未幾海陵下詔親征 輟耕錄云元至正乙未正月二十三日日日入時平江在城忽聞東方軍聲漸近驚視之但見黑雲一簇中彷彿皆類人馬前後火光若燈燭繇西方而沒正淮蘄徐黃蠶起之時也 朝野紀畧云弘治壬戌蘄郡醫生顧某見海濱浮氣宛成一室傍植竿木懸皂旂于上凡三日不見踰年有施鈕之寇 山海經歷石之山有獸焉其狀如狸而白首虎爪名曰梁渠見則其國有大兵倚帝之山有獸焉其狀如鼯鼠白耳白喙名曰狙

如見則其國有大兵小次之山有獸焉其狀如猿而  
白首赤足名曰朱厭見則其國有大兵 集異志漢  
靈帝中平元年夏陳留郡濟陽成臯陽武城郭路邊  
生草悉備龍蛇鳥獸之形時曰草妖續漢志曰其狀  
五色羽毛頭目翅足皆具或人形操持弓矢牛馬萬  
物之狀是歲黑山賊張角等十餘輩並起后兄何進  
乃秉權漢遂微弱又董卓兵起焚燒宮闕之應 淮  
南子流星色青赤曰地鴈其所墜主兵起流星有光  
青赤曰天鴈軍甲之精華也

### 求生西方

世人佞佛往往求生西方考之史傳西方未必遂勝  
于中國也常閱晉法顯傳唐三藏法師傳及所撰西  
域風土記所歷諸國止有盜賊竊發與中國同並無  
如小說家所演妖魔鬼魅怪怪奇奇者至于佛所留  
遺亦止名勝古蹟如中國之有杏壇洙泗勝蹟耳未  
見有歷世不朽巍巍丈六之金身在也讀書偶見云  
朱泰應嘗從事使于印度諸國泰應謂其國中實佳  
乃人褻露可怪耳師子國乃天竺旁國也其國舊無

人止有鬼神及龍居之諸國商賈來市易鬼神不見其形出諸珍寶題其所堪價商人依價取之諸怪事大率如此今中國人奉佛往往欲死後超至西方極樂世界但未知考究豈知中土卽佛土耶所謂佛國者人多詭怪旣是褻露又無衣冠止有鬼神及龍居之有何可樂愚思所以爲佛國者必其機械心忘故也洛陽伽藍記宋雲至烏傷國國王見雲云大魏使來膜拜受詔遣解魏語人問曰卿是日出處人也雲答曰我國東界有大海水日出其中又問彼國有

聖人否雲具說周孔老莊之德次序蓬萊山上銀闕金堂神仙聖人並在其上又說管輅善卜華佗治病左慈方術如此之事分別言之王曰若如卿言卽是佛國我當命終願生彼國焉李適菴記遊云小

西天佛國屋宇以竹爲之所居面雪山山長一千六百里皆雪四時不消惟摩尼佛打坐石廣數丈無雪以石旁草生爲春枯爲冬記年老幼男婦皆各佛衣皮食肉飲血晨起誦心經畢向南跪拜願生南方極樂世界予康熙壬寅度此男佛二千五百四十春女

佛二千五百二十四春一佛死不拘男女以壽之長者稱佛老爲國長晝夜不絕火所炊木有烟無烟有殺伐以中國茶爲至寶

有喪不葬

昔伯彛叩武王之馬首言父死不葬爰及干戈夫人既歸化以入土爲安禮曰死有惡之道焉故葬者藏也所以藏親鬼不令人之指目之也一日不葬則爲親者一日之體鬼不安而爲人子顧能安其心乎每見久喪不葬之家其受陰譴人非爲最甚人柰何不一做悟焉 道山清話云孫莘老入相不及一年而罷坐父死不葬後莘老作家廟記自辨 畫墁錄云張璞者幽人少屢爲盜貝丘之役應募坎窟得官後



爲正使帶御器械涇原鈐轄知鎮戎軍被重疾忽叩  
頭乞三年葬畢死未幾疾已一日蛻殼如蟬竟三年  
亦不葬遂死不歲餘其子令發其墓取金帶抵罪世  
謂不葬之罪最有徵驗 來式如抄云太學羅輩以  
前程祈禱于神神告之曰子父母不葬已得罪于冥  
可亟歸輩曰某尚有兄何獨獲罪神曰子爲儒者明  
理義子兄碌碌不足責也夢覺大恐是年遂卒 通  
志畧云晉山濤爲吏部尚書用人皆先密啓然後公  
奏凡所公奏始終如其言嘗啓事曰臣欲以郗詵爲

溫令詔可尋又啓曰訪聞詵喪母不時葬遂于所居  
屋後假葬有異同之議請更選之三柳軒雜誌云胡  
楷世行常言先世繇徽來嘗買屋廣化寺側修理夾  
壁得故攢堂一尸僵臥如生觸之應手灰滅遂白有  
司遷瘞之後閱通典有假葬三年卽吉議郗詵母亡  
不致葬便于堂北壁外下棺謂假葬三年卽吉衛瓘  
以其不應除服而議詵云此方下濕惟城中高故遂  
葬于所居之宅祭于所養之堂不知其不可之辭  
江陰幾雜志云王景芬職方邵氏婿常州人生小兒

四五歲甚俊爽病且卒忽言翁婆留取其某長大必  
能葬翁婆景芬大駭始改葬其父母 孔氏談苑云  
三司副使陳洎卒後婢子附語亦云坐不葬父母當  
爲貴神今作賤鬼足脛皆生長毛 南史沈洙曰禮  
小記云久而不葬者惟主喪者不除其餘以麻終月  
數者除喪已注云其餘謂旁親如鄭所解衆子皆應  
不除王衛軍云久喪不葬惟主人不變其餘親各終  
月數而除 談苑又云陳靖爲吏部員外郎曉三命  
自言官高壽長一旦卒附婢子語平生最厚薛向向

往見之婢子冠帶而出語言動作真靖也向問吏部  
平生自知命何乃至此答云其甚有官壽皆如術數  
但以不葬父母乃被尅折旣而泣下 危稹漳州義  
阡記先王制禮喪葬有期下至于士則踰月而已何  
漳之爲子若孫者乃有不葬之俗耶其親死往往舉  
其柩而置之僧寺是蓋始于苟簡中則因循久則忘  
之矣嗚呼已則忘之而不知虛廊冷殿之間寒聲泣  
霜弱影弔月其望于子孫之一旦興念猶未已也  
後魏宋世梁以御史使河北還過汲郡見城旁多骸

骨移文州郡悉令收瘞其夜甘雨滂沱後周賀蘭祥  
為荊州刺史境內亢旱見發掘古塚暴露骸骨者命  
收瘞之卽時澍雨夫以瘞枯骨之感應如此則有喪  
不瘞者其罪何如

物之方者

天學初編云凡天下之物無有不圓者天圓地方以  
言其理則可耳若言其形則亦圓者天為鷄子之殼  
地為鷄子之黃日月星辰草木果實皆體圓水之滴  
而成珠漩而為窩亦無勿圓然圓蓋物之本來面目  
而亦有不盡然者 雲林石譜台州黃巖縣有方山  
其山之巔狀如斗因此得名所產石不以巨細有數  
色率皆方形其質稍粗 本草方解石敲破塊塊方  
解故以為名別錄曰方解石生方山李時珍曰方解

石與硬石膏皆光潔如白石英但以敲之段段片碎者爲硬石膏塊塊方稜者爲方解石 名山記云台之委羽山空明洞天其洞之旁產方石周正光澤五色錯雜雖加琢磨殆不過是大者三四分小者比米粒而小以斧粉碎之亦無不端方此卽雲林石譜所云耶 宇中一覽云洞庭君山產方竹不宜移植有江南人掘得一本種于園次年抽筍亦方然細軟不堪爲杖再年筍亦不方與他竹等耳昔李衛公常以方竹枝施金山寺僧越數年見僧詢方竹杖今在否

答云已規圓漆之矣德裕悵然 寧波志葛仙翁煉丹于定海靈峯寺植竹筍化爲竹而方又登州產方竹體如削成健勁可爲杖不讓張騫筍竹也融州亦出大者數丈 陸璣疏云詩谷中有蕤蕤益母也方莖白華 本草牡荊其木心方枝對生按方竹其枝亦對生故方 本草魴魚李時珍曰魴方也其形方 山海經歷兒之山其上多樞多橢木是木也方莖而圓葉黃花而毛其實如楝服之不忘 天中記云湖熟有山頂正方上有池水又云山形方如印故又

名印山始皇時望氣者云江南有天子氣東遊以厭  
之又鑿金陵以斷其勢今方山石碗是其所斷之地  
也

陵墓興廢之數

名勝志云殷湯陵在汾陰縣後魏太和中縣人張恩  
破其陵先有石柩以銅爲鎖盜開埏門矢發中三人  
皆斃恩更爲他計卒取墓物多是鐘磬及樂器投其  
銘于汾水後事泄爲有司所理乃于水次得其銘銘  
曰吾後二千年終困于恩繇是執事不復深其罪又  
山西澤州有成湯池舊傳商王因旱禱于此鑿池者  
二元至正間重修湯廟工徒渴飲池水水暴湧作雷  
鳴聲衆因建亭其上名曰顯化池又江隣幾雜志云

洛陽北有山泉卽湯所禱桑林之地有廟卽太乙之祠俗號爲聖王近因旱中使請禱得雨乃奏請封爲清淵侯失于考詳地誌致此謬夫商湯王能顯化于廟之中而不能顯化于墓之內能預知其數于二千年之前而不能弭救其變于二千年之後且同一廟也能顯化于衆工修廟之時而不能顯化于降封爲侯之日皆事理之不可解者也三代之時便有銘石耶便有設機伏弩耶皆難以測也 湧幢小品云劉太保秉忠祖康懿公弟秉恕墓俱在邢臺縣治西南

先賢村嘉靖年間爲盜所發內有石刻云爲盜者李淮事聞于府捕得治罪 杜光庭錄異記洪州大廳前有皂莢樹數人合抱鳥不敢棲人犯之者立有靈應相傳見之數百年矣大廳中非時不敢視事李憲爲太守旣至命伐其樹吏人爭之咸以爲不可憲竟伐去之旣而羣鴉數千鳴噪不已憲疑其下有物命掘之深數尺乃巨墓也中有石誌識言數百字末云郭璞墓也後五百歲開墓賊李憲是也所識將來之事至今猶有知者卽令修完其墓遷廳事以避之按

東晉元帝元年郭璞爲王敦所害事在金陵不知何緣墓在豫章東晉元年丁丑至唐文宗敬宗中卽五百歲矣 宣室志衛先生大經解梁人以文學聞不狎俗常閉門絕人事生而敏悟周知天文歷象以壽終墓于解梁之野開元中天水姜師度奉詔鑿無鹽河以漑鹽田剗室廬潰印墓甚多旣至衛先生墓得一石刻字爲銘蓋先生之詞也其銘曰姜師度更移向前三五步工人以言于師度師度嘆息久之曰衛先生真奇士也命工人遷其河遠先生墓數十步

開元中江南大水溺而死者十數郡明皇詔侍御史鄔載往巡視之載至江南忽見道旁有古墓水潰而穴出公念之命工遷其骸于高原旣發墓得一石鑿而成文蓋誌其墓也後有銘曰爾後一千年此地化爲泉賴逢鄔侍御移我向高原載覽而異之因考其年果千歲矣 又太和中柳光者常南遊行山道誤入山崦中日已晚見松逕盤曲行數里至一石室雲水環擁清泉交噴室有裊榻若人居者前對霞翠固非人境因臨流凝佇忽見一缶合于地光啓之其

缶下有泉周不盡尺其水清激舉卮以飲若甘醴盡  
十餘卮而已醉甚遂偃于榻及曉方寤回視石壁有  
雕刻文字極多遂寫其字置于神祠詞曰武之在卯  
堯王八季我棄其寢我去其辰深深然高高然人不吾  
知人不吾會繇今之後二百餘祀熠熠其光和和其  
始東方有兔小首兀尾經過吾道來至吾里飲吾泉  
以醉登吾榻而寐刻乎其壁與乎其義人誰以辨其  
東平子光異之遂行出徑約數十步回望其室盡無  
見矣光究之不得友人呂生者視而解之未幾告曰

吾盡詳矣此乃得道者語也唐氏之初建號武德武  
德二年歲己卯武之在卯蓋武德二年也堯皇高祖  
之號神堯曰八季者亦二年也我棄其寢我去其辰  
者言其絕去之時乃武德二年也深深然高高然人  
不我知人不我會者言其隱而人不知也繇今之後  
二百餘祀者言君之來值唐初至此二百餘矣熠熠  
其光和和其始者謂歲在丁未南方丙丁火未亦火  
位也今天子建號太和其始蓋元年也東方有兔小  
首兀尾者叙君之名氏東方甲乙木兔者卯也卯以



附木是柳字也小首兀尾是光字也經吾道來吾里  
言君之來也飲吾泉以醉登吾榻而寐言君之止也  
刻乎其壁奧乎其義誰人以辯其東平子謂其義奧  
而獨吾能辯之東平乃吾之邑也益又信矣此非得  
道者之遺記乎 西湖志行春橋有馬三寶墓不知  
何代人此地宋時爲左軍教場三寶墓墓教場內常  
欲去之有黑蜂數百出墓中不可近至元十五年六  
月軍廝名狗兒者掘發之得鐵券一題曰鴈門馬氏  
墓橫衝橋至元十五六狗兒壞我屋定數如此則行

春橋乃橫衝橋也

稽神錄能博者本建安津吏岸

崩出一古塚藤蔓縛其棺旁有石銘云欲陷不陷被  
藤縛欲落不落被沙閣五百年後遇能博博使平光  
寺僧爲率錢葬之博後至建州刺史 一統志高流  
之爲徐州刺史河決水絕城破一古墓銘曰死後三  
百年背底生流泉賴有高流之還吾上高原流之爲  
造棺槨改葬焉 上虞縣琵琶圻水經圻有古塚墮  
水甕上有隱起字云筮吉龜凶八百年落江中宋謝  
靈運取甕詣京咸傳觀焉 一統志云鐵棺在湖廣

歸州白狗峽其地亦名鐵棺峽唐將軍王果爲雅州  
刺史舟經三峽望見縣岸間有物似棺令人視之果  
棺也骸骨存焉旁有石誌云三百年後水漂我將及  
長江垂欲墮欲墮不墮遇王果果視之愴然因爲致  
祭而去 博物志漢夏侯嬰封滕公一日駕出東都  
門外馬悲鳴踣地不進命左右掘馬蹄下得一石槨  
有科斗書佳城鬱鬱三千年見白日吁嗟滕公居此  
室 江南野史沈彬年將八十居阜上有大樹可數  
拱嘗示家人曰吾死可葬此旣將葬穴其處乃古塚

見其間儼然一古燈臺上有燈一盞壙頭獲一銅牌  
上有鐫篆曰佳城今已開雖開不葬埋漆燈猶未葬  
留待沈彬來 隋唐嘉話洛陽南市卽隋之豐都市  
也初築外垣之時掘得一塚無甕篋棺中有平上朱  
衣銘云筮言居朝龜言居市五百年間于斯見矣考  
其年月當魏黃初二年 莊子狶韋曰衛靈公死卜  
葬于故墓不吉卜葬于沙丘掘之數仞得石槨焉洗  
而視之有銘曰不逢其子靈公奪吾里夫靈公之爲  
靈久矣 兩京記洛陽西市隋曰利人市而西北有

海池長安中僧法成所穿分水安渠以注之以爲放生之所穿池得古石銘云百年爲市而後爲池自置立市至是時百餘年矣 異聞記云天寶中商洛隱者任昇之自言五世祖仕梁爲太常大同四年於鍾山下獲古銘有小篆文云龜言土著言水甸服黃鍾啓靈址瘞在三上庚墮遇七中巳六千三百涑辰交二九重三四百圮錄示史官姚訾并諸學官詳議數月無能知者因緘其銘誠其子曰我代代子孫以此銘訪於通人倘有知者吾無所恨昇之雅聞鄭欽悅

之名卽告以先祖之意欽悅曰子當錄以示我我試思之昇之書遺其銘會欽悅適奉朝使方授駕于長樂驛得銘而繹之行及滋水凡三十里則釋然悟復書曰屬在途路據鞍運思頗有所得發壙者未知誰氏之子卜宅者實爲絕代之賢藏往知來隗昭之預識龔使無以過也謹稽諸歷術測會微旨當梁武大同四年歲次戊午言甸服者五百也黃鍾者十一也五百一十一年而圮從大同四年上求五百一十一年得漢光武帝建武四年戊子歲也三上庚二月上

旬之庚也其年三月辛巳朔十日得庚寅是也三月  
初葬於鍾山也七中巳乃七月戊午朔十二日得巳  
巳是初圮墮之日是日巳巳可知矣淡辰十二也從  
建武四年三月至大同四年七月總六千三百一十  
二月每月一交故云六千三百淡辰交也二九爲十  
八重三爲六末言四百則六爲千十八爲萬可知從  
建武四年三月十日庚寅初葬至大同四年七月十  
二日巳巳初圮計一十八萬六千四百日故云二九  
重三四百圮也其所言者但說年月日數耳 嘗考

十國春秋前蜀王承檢事高祖賜姓名與諸孫齒乾  
德時官常州節度使築防蕃城至上邳山下獲瓦棺  
內無尸惟存舌一片肉色紅潤堅如鐵石後有髑髏  
一中古錢一枚有二蛇振然飛去下得石刻篆字曰  
大隋開皇二年渭州刺史張崇妻夫人王氏年二十  
五嫁于崇五年而娠惡其妊娠遂卒銘曰車道之北  
印山之陽深深送玉鬱鬱埋香刻斯貞石煥乎遺芳  
世變陵谷險列城隍乾德丙年壞者合郎是歲爲乾  
德六年丙子合郎卽承檢小字也 前定錄云延陵

包隰因選泝舟于隋河人次爲之挽過符離縣之西  
有古樹樹下有穴根盤于上若廢井然而一僕忽誤  
墜落久而方出乃提一片石廣四寸有小篆其文曰  
旁有水上有道入百年中逢栲栳衆咸異之而莫知  
其所謂尋問墜穴者名栲栳也 又考開河記云麻  
叔謀開河至上源驛之東得一墓漆燈煌煌啓棺其  
人如玉髮生過腹矣得一石銘其字鳥跡之篆文曰  
我是大金仙死來一千年數滿一千年堦下有流泉  
得逢麻叔謀墓我在高原叔謀葬于城西

鳥獸率舞

虞書百獸率舞蓋言八音諧和而感動之也然鳥獸  
蟲魚固各自有能舞者類記之 竹書記年周宣王  
三十年有兔舞于鎬京 述異記周成王元年貝多  
國獻舞雀周公命返之 詞林海錯陶詩精衛銜微  
木將以填滄海刑天舞于戚猛志固常在註刑天獸  
名口中好銜于戚而舞 搜神記漢昭帝時燕有黃  
鼠銜其尾舞于王宮端門中王使吏飼以酒脯舞一  
日一夜不休卽死 山海經丹穴之山有鳥焉其狀

如鷄五采而文乃鳳也自歌自舞 通考云大宛國多善馬馬汗血其先天馬種馬有肉角數寸或解人語言及知音樂其舞與鼓節相應 南史宋孝武時河南獻舞馬詔羣臣爲賦謝莊所上甚美又使莊更作舞馬歌以令樂府歌之 梁史天監中禊飲于華光殿適其日河南國獻赤龍駒能拜伏善舞語張率與劉溉周興嗣爲賦武帝以率及興嗣爲工 梁武帝設無遮會舞象驚排突陞衛王公皆散惟黃門侍郎裴之禮與散騎常侍臧盾不動帝壯之以之禮爲

壯勇將軍北徐州刺史 瑯環記云姑蘓城中皮日休市有小橋名鶴舞父老相傳吳時有二鶴在其地對舞已而飛集金昌門外青楓橋東化爲鳳凰飛入雲今鳳凰橋是也沈學士詩不如雙白鶴對舞石橋邊 荊州有鶴澤在府境晉羊祜鎮荆門澤中多鶴嘗取教舞以娛賓客 神仙傳葛公指蝦蟇舞皆應節使止乃止 白氏集孤鸞見鏡睹其形謂爲雌必悲鳴而舞 搜神記云葛玄常指蝦蟇及諸行蟲燕雀之屬使舞應節如人 異苑云山鷄愛其羽毛映

水則舞魏武時南方獻之帝欲其鳴舞而無繇公子  
蒼舒令置大鏡其前鷄鑿形而前舞不知止遂乏死  
韋仲將爲之賦 羯鼓錄云宰相杜鴻漸能羯鼓永  
泰中爲三州副元帥西川節度使至成都有削杖者  
在蜀以二鼓杖獻鴻漸得之示于衆曰此尤物也當  
衣衾下收貯積時矣匠曰某于脊溝中養者十年及  
出蜀至利州西界望嘉陵驛入漢州矣自蜀南來始  
臨嘉陵江有山水境致其夜月色又佳乃與從事楊  
炎杜亞輩登驛樓望江月行觴讌話曰今日出艱危

脫猜迫外則不辱命于朝廷內則免中禍于微質安  
得不自賀乎遂命家僮取鼓與板笛以前所得杖酬  
奏數曲四山猿鳥皆驚飛鳴噉噉從事悉異之曰昔  
夔之搏拊百獸舞庭此豈遠耶鴻漸曰若某于此稍  
曾致功未臻玄妙尚能及此况至聖御天賢臣考樂  
飛走之類何有不感因言此有別墅近華嚴閣每遇  
風景晴朗時或登閣奏此初見羣羊牧于山下忽數  
頭躑躅不已某不謂以鼓然也及止鼓羊亦止某復  
鼓羊亦復然遂以疾徐高下而節之無不應之而變

旋有二犬自其家走而吠之及羣羊側遂漸止聲仰  
首似有所聽少選卽復宛頸搖尾亦從而變態是知  
率舞固不難矣 珍珠船云教舞驚者燒地置鯨其  
上忽抵掌使其跳梁旣慣習雖冷地聞鼓掌亦跳梁  
教龜鶴舞亦用此術 漢書宣帝時東浮大河神魚  
舞于河 大歷十四年五月丁亥放舞象三十二于  
劍山之陽 虞國爲日南守有惠政雙鴻隨行而舞  
東觀漢紀王阜爲重泉令吏民向化鸞止學儼阜爲  
張雅樂舉足垂翅應樂聲而舞

各西湖

從張玉南先生所記而增葺之

杭州西湖擅名天下晴好雨奇比于西子致令金亮  
有立馬吳山之志斯亦可謂勝絕寰區矣然天下之  
以西湖名者不一而足要必各有勝處茲臚而誌之  
在浙江則杭州有西湖矣而湖州府長興縣亦有西  
湖在縣西南五里一名吳越湖相傳吳王築吳城輦  
土于此遂成湖溉田至三千頃後涇廢唐貞元中刺  
史于頔復之 寧波府治西南有月湖亦名西湖有  
十景曰柳汀雪汀芳草洲芙蓉洲菊花洲月島松島



花嶼烟嶼竹嶼爲四明遊觀勝槩宋時文人多有題  
咏今湖存而洲島嶼廢 嚴州府城西南有西湖唐  
刺史侯溫開 衢州龍游縣西南有西湖宋馬天驥  
擬杭之西湖開此以備遊覽 溫州府城西有西湖  
謝靈運詩側聽旣窈窕環洲亦玲瓏仰視喬木杪俯  
臨大壑淙 在順天元氏掖庭記燕京城北三十里  
有玉泉山山半爲呂公巖帝于夏月常避暑于北山  
之下曰西湖者其中多荷蒲菱芡帝以文梓爲舟伽  
南爲楫刻飛鸞翔鶴施于船首隨風輕漾又作採菱

小船縛綵爲棚木蘭爲槳命宮娥乘之以採菱爲水  
戲 在應天則潁州西北有西湖長十里廣二里景  
象甚佳宋晏殊歐陽修蘇軾相繼爲守皆常晏賞于  
此題咏甚富 在河南則開封府兩西湖一在許州  
週九里一在鄆陵週二里石林詩話云許昌西湖與  
子城密相附緣城而下可策杖往來不涉城市云是  
曲環作鎮時取土築城因以其地導溪水瀦之略廣  
百餘畝中爲橫隄初但有其東之半耳且西廣于東  
增倍而水不甚深宋莒公爲守時因黃河春夫浚治

之始與西相通莒公嘗有詩云綠鴨東陂已可憐更  
因雲竇注新泉鑿開魚鳥忘情地展盡江湖極目天  
向夕舊灘都浸月遇寒新樹便留烟使君真欲稱漁  
叟願賜閒州不記年其後韓持國作大池水中取其  
詩名之曰展江然水面數瀾西邊終易湮塞數十年  
來公私規利者遂涸以爲田歲入纔三百斛以佐釀  
酒而水無幾矣予爲守時復以還舊稍益開浚渺然  
真有江湖之趣 河南歸德府之睢州亦有西湖  
河南汝寧府城西有西湖上有翠光亭待月臺舊志

云穎許陳蔡四州皆有西湖孔武仲詩亭下湖光凝  
不流及百尺樓臺醮新綠之句皆咏汝寧府城西之  
西湖也又云汝州城西有西湖一名龍塘陂其水四  
時不竭灌田千餘頃 在湖廣則孝感縣有西湖村  
宋太祖微時常索酒村姥姥持酒進言權禁甚嚴此  
私釀幸密之後登極弛西湖酒禁此縣又有東湖村  
徽宗時夜光燭天掘地得周九鼎貢于朝 湖廣沔  
陽州東南一百五十里有西湖 又景陵縣有西湖  
唐陸羽傳云景陵縣西湖有鴻鴈集陂橋上而遷小

兒于下僧史積師得之至三歲以易占得鴻漸于陸  
之爻而定姓名也 在福建則福州府城西有西湖  
相傳湖上舊有山越王無諸時一夕飛往臨海郡

漳州府城西有西湖泉極甘美可辟瘴厲上有綠蘿  
幽勝古諺云圓山嘯西湖平時出公卿宋張成六  
詩水遶漳城湖已平向來有記出公卿白袍不倦三  
冬學錦綬行看四馬榮又長泰縣西有西湖池 在  
四川則成都府崇慶縣有西湖湖中亭館回環乃一  
州之勝 又成都漢川西湖有金龜亭偽蜀武成三

年庚午六月五日廣漢太守孟彥暉奏有金龜九寸  
遊于西湖荷葉之上繪圖以獻 叙州富順縣有西  
湖方廣二頃水冽多佳魚菱芡蒲荷充滿其中宋程  
驤詩飽看西湖似輞川有懷無處問長年四山攢翠  
爭爲地一水涵空欲補天 范石湖吳船錄云蘇青  
城縣二十里至周家莊十里至蜀州郡圃內西湖極  
廣蘆花正盛呼湖船泛之繫纜修竹古木間景物甚  
野爲西川勝處湖中多小菱可食蜀無菱至此始見  
之 在廣東則潮州府治西有西湖綿亘十餘里中

有四亭曰倒影曰雲路曰立翠曰東嘯宋陳堯佐詩  
附郭水連山公餘獨往還治東又有東湖夏月荷花  
柳陰絕勝 瓊州府亦有東湖南湖與西湖東坡謫  
瓊州之儋耳此湖常爲所遊玩 廉州府有五湖東  
西南北中各一湖也東湖岸上陶弼建五湖亭 惠  
州府城西有豐湖焉廣一十里中有漱玉灘點翠洲  
明月灣披雲島諸勝此不名西湖而實在惠州城西  
亦東坡之所樂遊也湖上有平湖閣六如亭東坡之  
妾朝雲葬于亭下又云蕪州府城西羅湖亦名西湖

上有平湖書院宋寇準蘓軾蘓轍相繼謫此東坡常  
有西湖平狀元生之語郡守陳太常因取其語作書  
院而名之邛州有西湖池在白鶴 在廣西則桂林  
府西有西湖環浸隱山六洞廣七十餘里按隱山在  
府城西本名盤龍崗唐李渤出領乃辟通石林磴道  
若天造然因名隱山范成大志云隱山六洞皆在西  
湖中隱山之上 一曰朝陽二曰夕陽三曰南華四曰  
北牖五曰嘉運六曰白萑泛湖泊舟自西北登山先  
至南華出洞西西至夕陽洞窮有石門可出至北牖

出洞十許步至朝陽又西至北牖穴口狹隘側身入  
有穴通嘉運西湖之外既有四山巉巖碧玉千峯倒  
影水面固已奇絕而湖心又浸陰山諸洞之外別有  
奇峯繪畫所不及荷花時有泛舟故事勝賞甲于東  
南北潛洞在隱山之北中有石室石臺石果之屬石  
果作荔枝胡桃棗栗之形採取玩之或以釘盤相問  
遺南潛洞在西湖羅家山上 雲南府城西亦有西  
湖卽滇池之上流蒲藻長清人多泛舟遊賞 交趾  
浪泊在交州府東關縣一名西湖


藥寶採取之難

凡奇寶異藥來自遠方人第珍重之展玩服食之豈  
知人力採取亦自有百方艱難焉古聖王所以不貴  
異物也如廣東採珠之人繫絙于腰沉入海中良久  
得珠撼其絙船上人擊出之墜于鼃鼃蛟龍之腹者  
比比有焉有司名曰烏蛋戶 又合浦海中有珠池  
蛋戶投水採蚌取之歲有豐耗多得謂之珠熟相傳  
海底有處所如城郭大蚌居其中有怪物守之不可  
近蚌之細碎蔓延于外者始可採又或乘驪龍之睡

而奪于領下稍逢其寤輒爲糝粉雲南寶井寶氣悶  
入中之輒死須置水盤中盤底多竅水霏微四灑久  
隨而下寶氣始不上騰推此而言其類實多 西溪  
叢話云雍熙中供奉官于延德使高昌還行程云王  
居北庭北庭山中出礪砂山中常有烟氣湧起而無  
雲霧至夕光焰如炬火照見禽鼠皆赤采礪砂者着  
木底鞋若皮爲底者卽焦有穴出青泥出穴卽變爲  
砂石土人取以治皮云 李時珍云鉛生山穴石間  
人挾油燈入至數里隨礦上下曲折砍取之其氣毒

人若連月不出則皮膚萎黃腹脹不能食多致疾而  
死 西溪叢話又云昇立子伏豕圖有試烏場消石  
法云其色取白石英灸令熱將點上便消入石中道  
書言出烏場國能消金石爲水服之盡得長生其石  
出處氣極穢惡飛鳥不能過其上人或單服從之過  
身上諸蟲盡化爲水而得長生矣形如鶯管者良  
陳寔墨談拂菻國當日沒之處地有水銀海周圍四  
五十里國人取之之法先于近海十里許掘坑井數  
十乃使健夫駿馬皆貼金箔遙遷行近海邊日照金

光晃耀則水銀滾沸如潮而來其勢若粘裹其人即  
 回馬疾馳水銀隨趕若行緩則人馬俱撲滅也人馬  
 行速則水銀勢緩力微遇坑塹而溜積于其中然後  
 取之與香草同煎則成花銀



毒地

地以生物為王然亦有毒地出于常理之外者周叙  
 云嵩陽有郭汾陽廟金趙琢撰碑云汾陽領兵清河  
 朔至是索芻粟里人皆言是邦西南岡嘗出毒霧為  
 灾故田穀不秋無以供餉汾陽乃旋軍登其上以壓  
 之毒因以息里人立廟祀之相傳祠下有洞時有聲  
 隆隆蓋毒霧所出處 曲江志云龍塘濛濛對過山  
 中源自高州塘深且廣其田數十頃水有毒沾足即  
 爛若人食其田禾不一二年即死今號蠱毒田水多

魚人不敢食 搜神記云漢永昌郡不韋縣有禁水  
水有毒氣唯十一月十二月差可渡涉自正月至十  
月不可渡渡輒病殺人其氣中有惡物不見其形而  
似有聲如有所投擊而中木則折中人則害土人號  
爲鬼彈故郡有罪人徙之禁防不過十日皆死 李  
延壽曰吐谷渾部內有黃沙週圍數百里不生草木  
因號沙州 山堂肆考徼外火州地皆砂磧若遇大  
風則行者人馬相失徼外人呼爲瀚海宋史云沙漠  
五尺不育五穀沙中生草名登相收之以食

蝴蝶與喪祭之事

蝴蝶之爲物甚微何與人間事而往往喪祭之間有  
見之者易曰精氣爲物游翫爲變大抵蝴蝶俱從螟  
動之蟲類蛻化而成頗有游翫之意故以氣相感召  
與 彙堅雜錄云梁山有漢武帝廟至今祭者往往  
有一二百蝴蝶降祠所享其食近之不驚徹饌然後  
辭去時謂武帝侍從捉之者必至病常璩云益州刺  
史毀蜀中山川神祠取其松栢爲舟惟不敢毀武帝  
祠 畫墁錄云李鐸諫議知鳳翔卒有蝴蝶之祥自



殞所以至府宇蔽映無下足處府官尊卑接武不相  
辨揮拂不開踐踏成泥其大者如扇喪行逾月方散  
癸辛雜識楊昊字明之娶江氏少女連歲得子明  
之客死之明日有蝴蝶大如掌徘徊翔于江氏之旁  
竟日不去及聞訃聚族而哭其蝶復來繞江氏飲食  
起居不置也蓋明之不能割愛于少艾稚子故化蝶  
以歸耳李商常記之以詩云碧梧翠竹名家兒今作  
翩翩蝴蝶飛山川阻深羅網密君從何處化飛歸  
楊六芳娶謝氏謝亡未殮有蝶大如扇其色紫褐翩

翩自帳中徘徊飛集窻戶終日乃去 太平廣記梓  
州有陽關神卽蜀西鄉侯張翼德飛也靈應嚴暴州  
人敬憚之龍州軍判官王延鎬納成都美姬霞卿甚  
寵之携之赴官經陽神祠前過霞卿暴卒惟所生一  
女非延鎬所生倍哀憫之一日傳靈語具云爲陽關  
神所錄辭而得解從此又同寢處寫其貌而憑之至  
于盥漱飲食皆如生焉乃曰俟我嫁女乃與君別延  
鎬將更娶告之鬼亦許焉乃娶沈彥循女自是或女  
客列坐卽有一黑蝴蝶翩翩掠筵席方過率以爲常

延鎬為延津令方嫁其女資送甚備自是無聞 蛺蝶  
一名鬼車 河南通志汲郡人元翰林學士王暉母  
亡葬于沁曲後父亡合窆焉立堂既闢有二黃蝶飛  
出已而母柩蓋珠露凝綴晶明煥爛駢羅角結若寶  
幢纓絡之狀清香襲人移刻乃晞觀者莫不異之

子孫間有肖其祖

父子祖孫一脉之所傳一氣之所通往往貌有肖似  
宜其然矣乃有數傳之後而支裔仍復肖似其祖先  
則深可異焉集異記曰蘭陵蕭穎士楊府功曹秩滿  
南遊行侶共濟瓜州舟中有二少年熟視穎士相顧  
曰此人甚有肖于鄱陽忠烈王也穎士是鄱陽曾孫  
卽自款陳二子曰吾識爾祖久矣穎士以廣衆中未  
敢詢訪俟及岸方將啓請而二子遽負擔去穎士必  
謂非仙則神虔心嚮矚而已明年穎士北歸止于盱

貽邑長之署方與邑長下簾晝坐自門遽白云某吏于某處獲發塚盜共五六人登令召入皆反接其手束縛甚固旅之于庭穎士懸認江中二少年亦縲縛于內穎士驚曰斯二人非仙則神因具述曩事邑長卽令先窮二子須臾款服佐驗明著皆云我之發邱墓今有年矣穎士卽以前說再令詢之皆曰我嘗開鄱陽王塚大獲金玉當門有貴人顏色如生年方五十鬚髮斑白僵臥于石榻姿狀正與穎士相類無少差異我舟中遇子又知蕭氏固是鄱陽亂也因此啓

言我豈有他術哉常聞人之紹續其祖或二三五世則必有一人肖其祖先之形狀斯其驗與 睽車志文學楊良能邦禮其妻華亭鄭氏歸寧適其家改葬祖姑啓棺儼然不朽視其面貌長短無小異計其死之年乃鄭氏生之年也衆皆驚異 堯山堂外紀云曾棨字子棨永豐人永樂甲申狀元其生洪武乙巳九月七日亥時其孫追亦生洪熙乙巳九月七日亥時年月日時皆同因名追而追亦于成化戊戌探花及第鄭小同立之曾孫以其手紋似已故名之小同英

發不羣韞櫝六經人師尊之 郭頌世語魏黃初盜  
發吳芮塚見芮尸如生後盜遇南蠻校尉吳綱君形  
貌可類長沙王吳芮但君微短耳綱矍然曰是先祖  
也長沙王至綱四百四十年如前蕭穎士追至忠烈  
王亦二百八十年矣

儒家脫化

去來倏然坦化無碍此其遊行自得僧禪家示之以  
爲高然而理達則可前知心空則能無累吾儒往往  
有之顧不以駭俗驚人耳 孫公談圃云俞次尚與  
其妻素達理性次尚病呼其妻曰我將死時次尚二  
子在外妻曰吾欲先死君俟諸子至未晚也其妻奄  
然而化次尚爲文誌其墓已而諸子至明日告曰吾  
亦行矣卽薰沐跣坐而化次尚官至屯田郎 夢溪  
筆談云知道者苟未至脫然隨其所得淺深皆有効

蘇書一編 卷之八  
四  
驗尹師魯自龍圖謫官過梁下與一佛者談師魯自言以退爲樂其人曰此猶有所係不若進退兩忘師魯頓若有所得自爲文以記其說後移鄧州是時范文正公守南陽少日師魯忽手書與文正別仍囑以後事文正極訝之時方饌客掌書記朱炎在坐炎老人好佛學文正以師魯書示炎曰師魯遷謫失意遂至乖理殊可怪也宜往見之爲致意開諭之無使成疾炎卽詣見而師魯已沐浴衣冠而坐見炎來道文正意乃笑曰何希文猶以生人見待洙死矣與炎談

論頃時遂隱几而卒炎急使人馳報文正至哭之甚哀師魯忽舉首曰早已與君別安用復來文正驚問所以師魯笑曰死生常理也希文豈不達此又問其後事尹曰此在公耳又揖希文復逝俄頃又舉頭顧希文曰亦無鬼神亦無恐怕言訖遂長往師魯所養至此可謂有力矣 又吳人鄭夔甫少年登科有美才嘉祐中監高郵軍稅務常遇一術士能推人死期無不驗者令推其命不過三十五歲憂傷感嘆殆不可堪人有勸其讀老莊以自廣久之潤州金山寺一

僧端坐與人談笑間遂化去夔甫聞之喟然太息曰  
既不得壽得如此僧復何憾哉乃從佛者授首楞嚴  
經往還吳中歲餘忽有所見曰生死之理我知之矣  
遂釋然放懷無復芥蒂後調封州判官預知死日先  
期旬日作書與交游親戚叙訣及次序家事備盡至  
期沐浴更衣公舍外有小園面溪一亭潔飾夔甫至  
其間親督人洒掃及焚香揮手指畫之間屹然立化  
家人奔出呼之已僵矣亭亭如植木一手猶作指畫  
之狀郡守而下少時皆至士民觀者如牆明日乃就

殮 國老談苑徐鉉初自南唐入京市宅已歲餘見  
宅主貧困甚召謂之曰得非售宅虧直致是耶予近  
撰碑獲潤筆二百千可償爾矣宅主固辭不獲亟命  
左右輦以付之後黜邠州年七十手不釋卷常親寫  
許慎說文一部謹細無誤一日櫛罷命紙大書曰道  
者天地母授筆而絕 淮安志米元章晚年學禪有  
得率于淮陽軍先一月區處家事作親友別書預置  
棺坐臥飲食其中前七日不茹葷更衣沐浴及期遍  
請羣僚舉拂示衆曰衆香國中來衆香國中去擲拂

合掌而去。玉壺清話云南唐先主李昇受吳主禪  
長子璉妃封永康公主聞人呼公主則流涕辭不願  
稱宮中爲之慘戚璉卒永康終身縞素斥去容飾不  
茹葷血惟誦佛書但稱未亡人朝夕焚香對佛誓曰  
願兒生生世世莫爲有情之物唐延和中年二十四  
歲無疾坐亡凡五夕光如剪練長丈餘自口而出至  
殮溫軟如生。眉公見聞錄吾鄉定庵曹先生居廣  
富林年九十四將終時郡守孔公遣吏送米一石辭  
不受因手書答云老夫不食三日矣恐虛大夫之賜

謹辭先生未卒前之一日書于几席間云明日午時  
天地晦暝風雷震撼擊撞此時吾將逝矣子孫以爲  
先生好怪至期天地晦暝悉如先生言先生乃肅衣  
冠焚香拜天地祖宗畢端坐瞑目而逝。湧幢小品  
云葉廣彬字大宜號月窓少聰慧日記萬言爲舉子  
業甚精以親老遂輟業治園圃雜事然誦讀自如經  
史百家下及陰陽算術無不淹貫其子卽臺山先生  
晚年結社談詩喜熟寢一日其子桂山問曰寢安乎  
曰安殆將還造化矣又曰世人謂將死有鬼物甚妄

我但覺氣盡如五穀黃熟自歸又天堂地獄亦杳茫  
縱有之吾行可質鬼神非所懼因自誦曰八十年來  
識更真深知言行切修身謹言慎行無些過細數吾  
儕有幾人已復泣下子曰怛化乎曰非也吾今安坐  
得往思吾父母沒時病苦故悲年八十二一清波雜  
志云葛謙問乃重厚古君子宦情世故皆應以無心  
文采外深契禪悅倅毘陵常語人曰人生臘月三十  
夜要當了了方見平生着力處移守臨川一日屬微  
疾忽索筆書偈曰大洋海裏打鼓須彌山上聞鐘孽

鏡忽然撲破翻身透出虛空召僚吏示之曰生之有  
死如晝之有夜無足怪者若以道論安得生死若作  
生死會則去道遠矣語畢端坐而逝 珂雪齋外集  
云淮張爲吳王時有金氏女十餘歲能前知張士誠  
奉爲神明取之入室依其母旣長絕美欲納爲后不  
可將盡殺其家金氏許之曰太夫人實鞠養我辭太  
夫人去至則拜士誠母於堂下化去矣士誠大驚乃  
以籍沒常熟富民曹百萬貲財爲治塚墓今常熟猶  
有金姬塚云 錢江府志聞樂先生陳伯修以祠官



居南徐一日晝寢夢至一所殿宇巍然中有冠服而  
正坐者如天帝曰卿平生奏疏可悉錄以呈覽公對  
曰臣在杭州日因陳正彙事郡守賈偉復取焚滅矣  
帝曰擇能記者錄之卽有仙官導公至簾下幕中設  
几席筆硯上置一青册公沉吟間仙官曰不必追記  
盡在是矣開册前日草疏具在也帝喜曰已安排卿  
第六等官矣遂覺呼其子大理丞昱至引手按其頂  
則十字裂如小兒顛熱如火謂之曰與吾書謁刺數  
十將別親舊吾去矣其子曰大人何往公告以夢子

謂夢與帝面此爲內詔之兆公曰不然豐相之終亦  
夢朝帝永歸之兆也時太守虞純臣告其子曰適尊  
公有狀丐掛冠正康強何乃爾言未旣傳呼陳殿院  
來若已知其故者謂太守曰死生定數也公何訝戒  
其子曰凡吾治命事不可妄易日置酒別家衆親戚  
迨夜欬逆不止諸子至則已趺坐而往矣七日有僧  
來唁曰皆在瓜州夢一官人朱衣騎導從甚盛凌波  
而北人馬不濡或指言陳殿院也故欲瞻其遺像  
又蘓養直居丹陽後湖盛夏納涼方與客對奕有衣

禡者通謁羅浮山道人江觀潮既見曰羅浮黃真人  
 以公不好世之所好氣母已成令其持丹度公袖中  
 出小盒藥黃色而膏融以置佛室後食密雪和以龍  
 腦一夕暴下卒所親記道人言亟取磨飲即甦紹興  
 十七年歲旦與家人約別翌日東方未明披衣曳杖  
 出門行步如飛妻孥奔逐挽衣則已逝矣

不可理解之事

李元陽記畧云雲南劍川州石寶山緣崖多石觀音  
 諸菩薩羅漢像若雕鏤然及省其手足指爪剝折之  
 處又皆空洞如人之骨乃知為天成者又省其空洞  
 之穴皆有鑿痕反覆辨別莫究端倪 聞部疏云尤  
 溪縣有山銅鐵出焉山氓鑿得鐵即渡水北鐵乃爐  
 經宿不遷鐵不可煨此理之難辨者 名勝志云博  
 羅縣有石鑑在石樓之南有一石光彩如鑑石下有  
 黑白棋十八子往來相盪人拈之不起 隋唐嘉話

靈州鳴沙縣有沙人馬踐之輒鎗然有聲持至他處  
信宿之後則無復有聲 睽車志治平丁未歲漳州  
地震裂長數十丈濶丈餘有狗自中走出視其底皆  
林木枝葉蔚然 老學庵筆記熙寧癸丑華山阜頭  
峯崩峰下一嶺一谷居民甚衆皆晏然不聞乃越四  
十里外平川土石雜下如簸揚七社民家壓死幾萬  
人壞田七八千頃固可異矣紹興間嚴州大水壽昌  
縣有一小山高八九丈隨水漂至五里外而兩旁草  
木廬舍水退皆不壞則此山殆空行而過也 肅皇

大謨云陝西澄城山初爲一山嘉靖二十六年丁未  
此山分崩東西馳三四十里遺址平陷 宋史慶元  
二年台之黃巖縣有山自徙五十餘里聲如雷草木  
冢墓皆不動而故址則潰爲淵潭 宋孝宗乾道二  
年三月丙午夜福清石竹山大石自移聲如雷石方  
可九丈所過成蹊才四尺而山之木石如故 南方  
草木狀云水松葉如檜而細長出南海土產衆香而  
此木不大香故彼人無佩服者嶺北人極愛之然其  
香殊勝在南方時植物無情者也不香于此而香于

彼豈屈于不知已而伸于知已者與 桂海器志竹  
 釜錡人所用截大竹筒以當鑪鼎食物熟而竹不燼  
 蓋物理自爾非異也浙江沿海等處以竹篾代鐵盤  
 煮鹵其中火然于下鹽成而竹亦不焦同此理 後  
 山談叢云秘書丞張鏐嗜酒得奇疾中身而分左常  
 苦寒雖暑月中着襪褲紗綿相半 陳文燭遊峨山  
 記娑羅坪捫石穿林黯黯不見天日岩下磈磈甚多  
 千年積雪冰氣皚皚射人已上天門石度仙人橋投  
 光相寺宿老僧取米炊飯為言頂池水無泉脉可給

千人炊米數沸中食過百沸則心結粉粒反不可食  
 大業拾遺云大業七年二月初造釣臺之時多運  
 石者將船兵丁困敝于役嗟嘆聲聞于道路時運石  
 之人將船于江東岸山取石累構為釣臺之基忽有  
 大石如牛十餘自山頂飛下直入船內如人安置船  
 無所損 錄異記新北市是景雲觀舊基有一巨石  
 大如柱礎人或坐之蹋之逡巡如火燒應心煩熱因  
 便成疾往往致死古老相傳若聚火燒此石吼即瞿  
 塘山吼而水沸又蜀州晉原縣山亭中有二大石各

經二尺已來出地七八尺人或坐之心痛往往不救  
又是落星東邊者坐卽靈西邊者坐之與諸石無異  
色並帶青白 洽聞記云南嶽岫嶠峯有響石呼喚  
則應如人其語不可解也南河縣東南三十里丹溪  
有響石高三丈五尺濶二丈狀如臥獸人呼之應笑  
亦應之塊然獨處亦號曰獨石也 酉陽雜俎有人  
遊南山乳洞深數里乳旋滴瀝成飛仙狀洞中已有  
數十若工刻玉石者眉目衣服形製精巧一處滴至  
腰以上其人因手承漱之經年再往見所承滴像已

成矣乳不復滴當手承處衣袂一寸不就 天中記  
寶歷元年資陽縣山有大石忽然吼踴下山越澗却  
上坡百步其石走時有鋤禾人見之各執鋤耨至止  
所其石高二丈 又李師誨兄弟于衲僧處得落星  
石一片僧云于蜀路早行見星墜于前遂掘之得一  
片石如斷磬其石端有雕刻狻猊之首亦如磬有孔  
穿縑處尚光滑豈天上奏樂器而墮與此石流傳安  
邑李吉甫宅中 北史隋盧大翼幼稱神童後目盲  
以手撲書而知其字 南史梁陰子春雖無才術臨

人以廉潔稱閨門混雜而身服垢汚脚數年一洗言  
每洗則失財敗事云在梁州以洗足致梁州敗 名  
山記招寶山有棋子坪凡欲取棋子者先以白飯撒  
之翌日可得白子以黑豆撒之翌日可得黑子 晉  
書朱漢賓少時善射常與同輩出獵指一飛鴈隨矢  
而落其鏃正中其臆上貫一金錢有篆文示其郡之  
碩儒皆無識者人甚異之繇是人皆號之曰朱落鴈  
草木子元至正丙午夏平江路當午天大雷雨有  
一富家正廳安置匡床胡椅圓爐臺桌廳旁一室封

鎖如故雷震壁破一孔如蓋大其床椅爐桌皆從此  
孔入堆叠滿室人皆不解其異 涼州異物志有大  
人生于北邊偃臥于野其高如山頂脚成谷橫身塞  
川人若近視卽有尖銅雹擊之注曰惟可遙看不可  
到下到下則雷霆流銅鐵之丸以擊人 七修類稿  
青州府城外羅北門曰鎮青門俗曰馬共左轉數丈  
將抵門座之角人或持石擊地自遠至磚中則磚中  
若鷄棲之聲予親試之果然 彭文憲筆記 戊化元  
年五月京師大風一時蕭牆以西地上有

然視之皆黃泥丸于堅淨如櫻桃大拾而

疏黃氣 都公譚纂云松江上海縣地名十字廟有

農家誦經颺旛行者暑倦置牛皮于旛下忽陰雲四

合霹靂擊碎旛竿牛皮不知所向但見農家屋上竹

針萬計皆長三寸許彈丸皆如櫻桃竹針皆長三寸

是孰爲而孰較量之

